



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

24.07.2023. – 28.07.2023.

ODJELJENJE ZA BANKARSTVO, SLUŽBA *FRONT OFFICE*



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA 24.07.2023. – 28.07.2023.


Tabela 1: Prikaz kretanja prinosa na državne obveznice

Prinosi	Eurozona		SAD		Velika Britanija		Japan	
	21.7.23	28.7.23	21.7.23	28.7.23	21.7.23	28.7.23	21.7.23	28.7.23
2 godine	3.09	3.05	4.84	4.87	4.96	4.99	-0.03	-0.03
5 godina	2.55	2.55	4.09	4.18	4.37	4.41	0.12	0.16
10 godina	2.44	2.49	3.83	3.95	4.28	4.33	0.45	0.57

Tabela 2: Prikaz kretanja prinosa na njemačke Bubillove

Dospijeće	Prinosi	
	21.7.23	28.7.23
3 mjeseca	3.545	3.555
6 mjeseci	3.532	3.531
1 godina	3.661	3.653

Grafikon 1: Prikaz krivih prinosa državnih obveznica



Grafikon prikazuje krive prinosa Njemačke (zelena), SAD-a (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 28.07.2023. godine (pune linije) i 21.07.2023. godine (isprekidane linije). Na donjem dijelu grafikona prikazana je razlika između vrijednosti odgovarajućih prinosa na navedene datume.

EUROZONA

Prinosi obveznica eurozone su u odnosu na prethodnu sedmicu na prednjem i srednjem dijelu krive uglavnom zabilježili pad, dok su na krajnjem dijelu krive prinosa blago povećani. Prinosi njemačkih obveznica u segmentu 2 do 5 godina dospjeća su smanjeni za 1 do 4 bazna poena, dok je kod desetogodišnjih obveznica zabilježen rast prinosa od 2 bazna poena. Također, kod italijanskih obveznica u segmentu 2 do 5 godina dospjeća prinosi su smanjeni za 1 do 8 baznih poena, dok je kod desetogodišnjih obveznica došlo do rasta od 4 bazna poena.

Proteklog četvrtka ECB je održao sjednicu na kojoj je, u skladu s očekivanjima, **povećao sve tri ključne kamatne stope za 25 baznih poena. Kamatna stopa na depozite banaka (eng. *Deposit Facility Rate*) povećana je na 3,75% s 3,50%, dok je glavna stopa refinansiranja povećana na 4,25%.** Povećanje navedenih kamatnih stopa stupa na snagu 2. augusta. Iz ECB-a je saopšteno da će kamatne stope biti postavljene na „dovoljno restriktivne“ nivoe onoliko dugo koliko bude potrebno, što je izmjena u odnosu na junsko saopštenje u kojem je navedeno da će stope „biti dovedene na nivoe koji su dovoljno restriktivni“. ECB je ponovio svoje upozorenje da se i dalje očekuje da će inflacija ostati „previsoka predugo“ i obavezao se da će slijediti „pristup koji zavisi od podataka“ u budućim odlukama o kamatnim stopama. ECB je također promijenio svoj opis inflacije kako bi ukazao na to da je sigurniji da su pritisci

na cijene na silaznoj putanji. Iznenađujućim potezom, ECB je također promijenio stopu naknade na minimalne obavezne rezerve s nivoa kamatne stope na depozite (ranije 3,5%) na 0%. Tom odlukom ECB namjerava očuvati efikasnost monetarne politike, jer će se zadržati trenutni stepen kontrole nad njom, te postići potpun prijenos odluka o kamatnim stopama na tržišta novca.

Predsjednica Lagarde je izjavila da su se kratkoročni ekonomski izgledi pogoršali i naglasila da su u septembru otvorene dvije opcije: pauziranje povećanja ili još jedno povećanje kamatnih stopa. Lagarde je izjavila da ECB nije razgovarao o smanjenju bilansa stanja, te da smanjenje stope naknade za obaveznu rezervu nema nikakvog uticaja na stav ECB-a o monetarnoj politici. U nastavku je dat pregled makroekonomskih prognoza objavljenih u redovnoj ECB-ovoj anketi profesionalnih prognozera.

Ekonomske prognoze za juli 2023.	Eurozona		
	2023.	2024.	2025.
Inflacija	5,5% (5,6%)	2,7% (2,6%)	2,2% (2,2%)
Nezaposlenost	6,6% (6,8%)	6,7% (6,8%)	6,7% (6,6%)
GDP	0,6% (0,6%)	1,1% (1,2%)	1,5% (1,6%)

Poslovna aktivnost u eurozoni zabilježila je oštriji pad nego što se očekivalo u julu, pri čemu je dominantni uslužni sektor bilježio pad potražnje, dok je prerađivački sektor zabilježio smanjenje najbržom stopom od početka pandemije virusa COVID-19. Kvartalno istraživanje ECB-a o bankarskim kreditima pokazalo je da je neto potražnja firmi za kreditima snažno pala u II kvartalu 2023. godine, te je smanjena na najniži nivo od početka istraživanja 2003. godine. Snažno je smanjena i potražnja domaćinstava za kreditima. Banke su kao razloge navele rast kamatnih stopa i manje potrebe za finansiranjem investicija, a za koje očekuju da će se nastaviti i u III kvartalu, ali sporijim tempom. Osim toga, istraživanje je pokazalo da su banke više zabrinute zbog nenaplativih kredita i pooštrenih kreditnih standarda. Predsjednik Ifo Instituta je istakao kako Ifo indeks bilježi treći uzastopni i značajan pad, napominjući da se čini da njemačka ekonomija teško izlazi iz recesije zbog kratkoročnih izazova i uticaja monetarne politike i kretanja cijena energije. Napomenuo je i da, dugoročno gledano, strukturne promjene u prelasku automobilske industrije na električna vozila i razvoj cijena energije ostaju izazovi za njemačku ekonomiju. S druge strane, MMF je bio optimističan po pitanju njemačke ekonomije, napominjući da je to jedina nacija grupe G7 koja će ove godine doživjeti kontrakciju, procijenjenu na - 0,3%, dok se bori s posljedicama rata u Ukrajini.

Tabela 3: Kretanje ekonomskih indikatora za eurozonu

Red. br.	Ekonomski indikator	Očekivanje	Stvarno	Prethodni	
			stanje	period	
1.	GDP – Njemačka (Q/Q) prelim.	II kvartal	0,1%	0,0%	- 0,1%
2.	GDP – Francuska (Q/Q) prelim.	II kvartal	0,1%	0,5%	0,1%
3.	GDP – Španija (Q/Q) prelim.	II kvartal			
4.	GDP – Austrija (Q/Q)	II kvartal	-	-0,4%	0,1%
5.	GDP – Belgija (Q/Q) prelim.	II kvartal	-	0,2%	0,4%
6.	GDP – Irska (Q/Q) prelim.	II kvartal	-	3,3%	- 2,8%
7.	Povjerenje potrošača – EZ (final.)	JUL	- 15,1	- 15,1	- 16,1
8.	GfK indeks povjerenja potrošača – Njemačka	AVG	- 24,8	- 24,4	- 25,2
9.	Ifo indeks očekivanog povj. potrošača – Njemačka	JUL	83,4	83,5	83,8
10.	PMI kompozitni indeks – EZ (prelim.)	JUL	49,6	48,9	49,9
11.	Monetarni agregat M3 – EZ (G/G)	JUN	0,9%	0,6%	1,0%
12.	Stopa inflacije – Njemačka (prelim.)	JUL	6,6%	6,5%	6,8%
13.	Stopa inflacije – Francuska (prelim.)	JUL	5,1%	5,0%	5,3%
14.	Stopa inflacije – Španija (prelim.)	JUL	1,6%	2,1%	1,6%

15.	Stopa inflacije – Irska (prelim.)	JUL	-	4,6%	4,8%
16.	Potrošnja stanovništva – Francuska (G/G)	JUN	-	- 2,8%	- 3,5%
17.	Obim maloprodaje – Finska (G/G) preliminar.	JUN	-	- 3,3%	- 1,8%
18.	Obim maloprodaje – Irska (G/G)	JUN	-	7,6%	6,1%
19.	Maloprodaja – Španija (G/G)	JUN	-	6,4%	6,1%
20.	Stopa nezaposlenosti – Španija (Q/Q)	II kvartal	13,0%	11,6%	13,26%
21.	Ukupan broj nezaposlenih – Francuska (u '000)	II kvartal	-	2.799,5	2.801,4

SAD


Prinosi na američke državne obveznice su tokom protekle sedmice zabilježili rast duž cijele krive, posebno na krajnjem dijelu. Fokus investitora je bio na sjednici FMOC-a, te objavljivanju ekonomskih podataka, posebno PCE deflatora i GDP-a. Objavljivanje pozitivnih podataka o stopi rasta američke ekonomije u II kvartalu, usporavanju inflacije, te pozitivnih podataka s tržišta rada uticalo je pozitivno na finansijsko tržište. **Protekle sedmice je održana sjednica FOMC-a, na kojoj je, u skladu s očekivanjima, donesena odluka o povećanju referentne kamatne stope za 25 baznih poena, odnosno njenog ciljanog raspona na 5,25%–5,50%, uz napomenu da se ostavljaju „otvorena vrata“ za još jedno povećanje.** Ovim povećanjem, na snagu je stupila najviša referentna kamatna stopa Feda u posljednje 22 godine. Nakon sjednice je saopšteno da će Fed nastaviti procjenjivati dodatne informacije i njihove implikacije na monetarnu politiku u određivanju obima njenog dodatnog pooštavanja, a kako bi se postigao ciljani nivo inflacije od 2%. Predsjednik Feda, Powell, je izjavio da je „svakako moguće“ da će se FOMC ponovo „pokrenuti“ u septembru, ali je moguće i zadržavanje kamatnih stopa na ovim nivoima. Powell je istakao da je pad ukupne inflacije značajan, ali je dodao da je temeljna inflacija i dalje prilično povišena. Također, Powell je izjavio kako zvaničnici Feda više ne predviđaju recesiju, te je naglasio da ne vjeruje da će doći do smanjenja kamatnih stopa ove godine. Predsjednik Feda iz Minneapolisa, Kashkari, je izjavio kako su izgledi inflacije u SAD-u „prilično pozitivni“, iako će agresivna monetarna kampanja Feda za suzbijanje skokova cijena vjerovatno rezultirati gubitkom nekih radnih mjesta i sporijim ekonomskim rastom. Kashkarijevi komentari dolaze nakon ključnih podataka koji pokazuju da je inflacija u SAD-u usporila s pandemijskih maksimuma, te da je rast ostao stabilan, dok potrošači nastavljaju trošiti, čak i kada je Fed podigao kamatne stope na najviši nivo u posljednje 22 godine.

Tabela 4: Kretanje ekonomskih indikatora za SAD

Red. br.	Ekonomski indikator		Očekivanje	Stvarno stanje	Prethodni period
1.	Indeks povjerenja potrošača	JUL	112,0	117,0	110,1
2.	Prodaja novih kuća (M/M)	JUN	- 5,0%	- 2,5%	6,6%
3.	MBA aplikacije za hipotekarne kredite	21. jul	-	- 1,8%	1,1%
4.	Veleprodajne zalihe (M/M) P	JUN	- 0,1%	- 0,3%	- 0,3%
5.	Narudžbe trajnih dobara (prelim.)	JUN	1,3%	4,7%	2,0%
6.	GDP (Q/Q) godišnje – (prelim.)	II kvartal	1,8%	2,4%	2,0%
7.	Inicijalni zahtjevi nezaposlenih za pomoć	22. jul	235.000	221.000	228.000
8.	Kontinuirani zahtjevi nezaposlenih	15. jul	1.750.000	1.690.000	1.749.000
9.	Lični prihodi	JUN	0,5%	0,3%	0,5%
10.	Lična potrošnja	JUN	0,4%	0,5%	0,2%
11.	PCE deflator (G/G)	JUN	3,0%	3,0%	3,8%
12.	Indeks raspoloženja potrošača Un. iz Michigana F	JUL	72,6	71,6	64,4

USD je aprecirao u odnosu na EUR, te je kurs EUR – USD zabilježio pad s nivoa od 1,1124 na nivo od 1,1016, što na sedmičnom nivou predstavlja pad od 0,97%.

Grafikon 2: Kretanje kursa EUR – USD tokom protekle sedmice



VELIKA BRITANIJA

Savjetnici ministra finansija, Hunta, su tokom protekle sedmice izjavili da bi Velika Britanija mogla ući u nepotrebnju recesiju, ukoliko BoE bude previše povećavao kamatne stope u narednim mjesecima. Većina Huntovog sedmočlanog Ekonomskog savjetodavnog foruma vjeruje da bi BoE trebao usporiti svoj najbrži ciklus povećanja kamatnih stopa. Najviši zvaničnici Ministarstva finansija ozbiljno shvataju navedeno, nakon što su objavljeni bolji podaci inflacije od očekivanja. Prema očekivanju tržišnih učesnika, BoE će na sastanku koji se održava 3. augusta vjerovatno povećati kamatnu stopu za 25 baznih poena. S obzirom na to da je stopa inflacije na silaznoj putanji, pojačani su razlozi za manja povećanja kamatne stope. BoE će također objaviti nove prognoze koje će se vjerovatno zadržati duži vremenski period. S obzirom na to da je ciljani nivo inflacije još daleko, vjerovatno će se nastaviti s povećanjem kamatne stope i u septembru i u novembru, ostavljajući konačnu kamatnu stopu na nivou od 5,75%.

MMF je tokom protekle sedmice saopštio da je saglasan s posljednjom prognozom ekonomskog rasta u Velikoj Britaniji u 2023. godini, dodavši da su jeftina energija, bolji odnosi s Evropskom unijom i mirnija finansijska tržišta poboljšali izgled od početka 2023. godine. Očekuje se da će se GDP Velike Britanije povećati za 0,4% tokom ove godine i 1,0% u 2024. godini, u skladu s prognozama MMF-a iz maja. Nakon što je završena revizija, MMF predviđa da će Velika Britanija biti druga najgora ekonomija u zemljama grupe G7 2023. godine, poslije Njemačke.

BoE je u petak saopštio da će bivši predsjednik Fed-a, Ben Bernanke, koji je inače vodio najveću svjetsku ekonomiju kroz finansijsku krizu tokom 2008. godine, predvoditi reviziju datih prognoza BoE-a, nakon što je BoE dobio žestoke kritike na račun svojih prognoza. Data revizija ima za cilj da ojača način na koji će osoblje BoE-a podržavati Odbor za monetarnu politiku, odluke u vezi monetarne politike u neizvjesnim vremenima, kao i da razmotri da li procedure i analize podržavaju donošenje odluka Odbora. Konačni rezultati revizije će biti objavljeni u proljeće 2024. godine. BoE je objavio početne planove za reviziju tokom prošlog mjeseca nakon što je bio izložen žestokim kritikama zbog toga što više puta nije predvidio dati rast i upornost inflacije u Velikoj Britaniji. Guverner BoE-a, Bailey, je priznao da su u maju bile „veoma velike lekcije“ o tome kako se BoE nosio s ekonomskim šokovima u posljednje vrijeme. Bailey je dodao da će data revizija omogućiti da se naprave koraci unazad i da se razmisli o tome gdje se njihovi procesi trebaju prilagoditi globalnom tržištu, koje se sve više suočava s neizvjesnostima.

Tabela 5: Kretanje ekonomskih indikatora za UK

Red. br.	Ekonomski indikator	Očekivanje	Stvarno	Prethodni
			stanje	period
1.	PMI indeks prerađivačkog sektora P	JUL	45,0	46,5
2.	PMI indeks uslužnog sektora P	JUL	51,5	53,7
3.	Kompozitni PMI indeks P	JUL	50,7	52,8
4.	CBI poslovni optimizam	JUL	6	- 2

Tokom protekle sedmice, GBP je aprecirao u odnosu na EUR, pa je kurs EUR – GBP zabilježio pad s nivoa od 0,86562 na nivo od 0,85739. GBP je blago deprecirao u odnosu na USD, pa je kurs GBP – USD smanjen s nivoa od 1,2854 na nivo od 1,2851.

JAPAN

Sjednica MPC BoJ-a je završena proteklog petka, te na njoj nije došlo do promjena u monetarnoj politici. BoJ je zadržao postojeću monetarnu politiku nakon dvodnevnog sastanka (negativnu referentnu kamatnu stopu od - 0,1% i ograničenje od 0% na prinos 10-godišnjih obveznica), sve kako bi pokušao podržati nastajuću ekonomski oporavak i održivo postići svoj ciljani nivo inflacije. BoJ je saopštio da će i dalje dozvoliti da prinosi fluktuiraju u rasponu od oko 0,5% do - 0,5%, ali da će sprovesti kontrolu krive prinosa s većom fleksibilnošću. Također je saopštio da mu je

potreban spretniji pristup kako bi održao stabilnost finansijskih tržišta, dok radi na cilju održavanja inflacije blizu 2%. Inače, BoJ se suočio s pritiskom da prilagodi svoju politiku pošto su Fed i druge velike centralne banke povećale kamatne stope kako bi usporile kreditiranje i obuzdale inflaciju. Stopa inflacije zaostaje za onom u SAD-u i Evropi, ali je za sada preko 3%. U saopštenju BoJ-a revidirana je procjena za ekonomski rast u tekućoj fiskalnoj godini, koja se završava u martu, na 1,3 s 1,4%, dok je povećana prognoza temeljne inflacije, koja isključuje cijene hrane i energije, na 2,5% s prethodnih 1,8%.

Nakon što je završena sjednica MPC BoJ-a, guverner Ueda je na konferenciji izjavio da, iako je inflacija od 2% postignuta već neko vrijeme, BoJ nije uvjeren u budući oporavak i stoga je odlučio zadržati postojeću monetarnu politiku. Pored toga, Ueda je objasnio da prilagođavanje politike YCC-a nema za cilj normalizirati monetarnu politiku, već je učiniti fleksibilnijom i više održivom, kako bi se pripremila za rizike u budućnosti. Pojedini analitičari smatraju da bi prilagođavanje YCC-a moglo omogućiti BoJ-u da zadrži svoj ultrastimulativni stav duži vremenski period. Guverner Ueda je izjavio da je BoJ prilikom odlučivanja razmišljao o volatilnostima na deviznim tržištima. S druge strane, panel Vlade Japana je predložio da se nacionalna prosječna minimalna plata poveća za 41 JPY (0,29 USD) po satu, na 1.002 JPY, što bi bilo najveće povećanje ikada u smislu vrijednosti, budući da premijer Kishida ističe plate kao ključni fokus svoje politike. Kishida je izjavio da pozdravlja prijedlog, dodavši da je rast plata jedan od najvažnijih izazova za njegovu administraciju.

Tabela 6: Kretanje ekonomskih indikatora za Japan

Red. br.	Ekonomski indikator		Očekivanje	Stvarno stanje	Prethodni period
1.	PMI indeks prerađivačkog sektora P	JUL	-	49,4	49,8
2.	PMI indeks uslužnog sektora P	JUL	-	53,9	54,0
3.	Kompozitni PMI indeks P	JUL	-	52,1	52,1
4.	Prodaja širom zemlje (G/G)	JUN	-	7,0%	6,3%
5.	Indeks proizvođačkih cijena uslužnog sektora (G/G)	JUN	1,5%	1,2%	1,7%
6.	Vodeći indeks F	MAJ	-	109,2	108,1
7.	Koicidirajući indeks F	MAJ	-	114,3	114,2
8.	Stopa inflacije u Tokiju (G/G)	JUL	2,9%	3,2%	3,2%

JPY je tokom protekle sedmice aprecirao u odnosu na EUR, te je kurs EUR – JPY zabilježio pad s nivoa od 157,68 na nivo od 155,42. JPY je aprecirao i u odnosu na USD, te je kurs USD – JPY zabilježio pad s nivoa 141,73 na nivo od 141,16.


NAFTA I ZLATO

Cijena jednog barela sirove nafte na otvaranju tržišta u ponedjeljak iznosila je 77,07 USD (69,28 EUR). Protekle sedmice, cijena nafte je, petu sedmicu zaredom, imala tendenciju rasta. Početkom sedmice, cijena ovog energenta bilježila je rast, jer je *Exxon Mobil* zatvorio pogon za benzin u svojoj rafineriji u Baton Rougeu, dok su rezovi OPEC+ počeli sužavati globalne zalihe. Uprkos izgledima za još jedno povećanje kamatnih stopa Fed, znaci zaoštrenijeg tržišta sirove nafte i „osjećaj rizika“ na tržištima dionica podstakli su cijenu sirove nafte. Korelacija između tržišta energije i dionica porasla je na najviši nivo u više od dvije godine, što je dovelo do viših cijena fjučersa. U utorak je cijena nafte nastavila bilježiti rast oko najvišeg nivoa u posljednja tri mjeseca, podržana tržišnim optimizmom daljnjih stimulacija kineske Vlade. U srijedu je, a nakon sjednice FOMC-a, cijena ovog energenta zabilježila pad za oko 1% u odnosu na prethodni dan. Generalno, nafta je povećana u julu zbog smanjenja ponude zemalja OPEC+. Istraživanje *Bloomberga* je pokazalo da se očekuje da će Saudijska Arabija produžiti smanjenje isporuke nafte od milion barela u septembru.

U četvrtak je, a nakon podataka o rastu stope GDP-a u SAD-u, cijena nafte ponovo zabilježila rast. Podaci o zalihama od strane EIA-e pokazuju da su komercijalne zalihe sirove nafte pale za 600.000 barela u sedmici koja je završila 21. jula, dok je brazilska nacionalna naftna kompanija *Petrobras* prijavila pad proizvodnje nafte od 0,6% na godišnjem nivou u drugoj polovini ove godine, kriveći proces održavanja. OPEC+ će sljedeće sedmice održati svoj mjesečni sastanak, s fokusom usmjerenim na Saudijsku Arabiju, koja je produžila svoje dobrovoljne rezove s jula na august. U petak je nastavljen rast cijene nafte na najviši nivo od polovine aprila ove godine, dok su investitori optimistični da će zdrava potražnja i smanjenje ponude održati cijene u porastu. Direktor *Exxon Mobila*, Darren Woods, izjavio je da očekuje rekordnu potražnju za naftom ove i sljedeće godine.

Na zatvaranju tržišta u petak, cijena jednog barela sirove nafte iznosila je 80,58 USD (73,15 EUR). Na sedmičnom nivou, cijena nafte je petu sedmicu zaredom zabilježila rast, te je u odnosu na prethodnu povećana za 4,55%.

Grafikon 3: Kretanje cijene nafte tokom protekle sedmice




Na otvaranju londonske berze metala u ponedjeljak, cijena jedne fine unce zlata iznosila je 1.961,94 USD (1.763,70 EUR). Početkom sedmice, cijena zlata je bilježila blago smanjenje, dok su investitori čekali signale od vodećih centralnih banaka u vezi s potencijalnim povećanjem kamatnih stopa. Više kamatne stope obično imaju negativan uticaj na zlato jer ovaj plemeniti metal ne nosi nikakvu kamatu. Cijena zlata je nedavno povećana zbog očekivanja da će kamatne stope uskoro dostići vrhunac, a što je dovelo do toga da investitori koji trguju na *Comexu* postanu sve više bikovski orijentirani. Cijena zlata u EUR dostigla je najviši nivo od 5. jula, nakon što su podaci pokazali dublji pad poslovne aktivnosti u eurozoni. Investitori su najavili da će pažljivo pratiti izjave zvaničnika centralnih banaka u potrazi za bilo kakvim nagovještajima koji bi mogli gurnuti cijenu zlata na 2.000 USD po unci. Kina je potrošila 554,88 tona zlata u prvoj polovini 2023. godine, što je povećanje od 16,37% u odnosu na isti period prethodne godine, prema podacima Kineskog udruženja za zlato (CGA). Povećanje potražnje za zlatom uzrokovano je oporavkom ekonomije nakon pandemije virusa COVID-19, a dijelom je podstaknuto sve većom averzijom investitora prema riziku prilikom kupovine dionica i obveznica zbog zabrinutosti za globalno finansijsko okruženje.

U srijedu je cijena ovog plemenitog metala nastavila bilježiti rast, a nakon što je Fed očekivano povećao referentnu kamatnu stopu za 25 baznih poena i saopštenja da će daljnji potezi zavisiti od podataka uz signaliziranje mogućeg pauziranja na septembarskoj sjednici. Pad prinosa na obveznice inače je „značajan pokretač“ budućih kretanja cijene zlata. Slabljenje USD-a je također podržalo zlato, koje je obično u negativnoj korelaciji s USD-om. Brian Lan iz singapurske kompanije *GoldSilver Central* je izjavio da bi cijene zlata mogle biti promjenjive zbog toga što Fed spominje još jedno povećanje kamatnih stopa u ovoj godini, pri čemu će poluge vjerovatno imati blagi pomak, dodajući da sve zavisi od podataka koji će biti objavljeni u narednom periodu. Objavljivanje snažnih ekonomskih podataka vezanih za američku ekonomiju direktno je uticalo i na jačanje USD-a, a što se odrazilo na smanjenje cijene jedne fine unce zlata tokom trgovanja u četvrtak.

Na zatvaranju tržišta u petak, cijena jedne fine unce zlata iznosila je 1.959,49 (1.778,77 EUR). U odnosu na prethodnu sedmicu, cijena zlata je smanjena za 0,12%.

Grafikon 4: Kretanje cijene zlata tokom protekle sedmice



Odricanje od odgovornosti (Disclaimer)

Navedeni pregled kretanja zasnovan je na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantirati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.